

四庫全書

史部

欽定四庫全書

史部
東征集
目錄
卷一至三

詳校官編修臣李潢

編修臣裴謙覆勛

總校官進士臣朱鈐

校對官典簿臣郭祚熾

謄錄監生臣余士榮

欽定四庫全書

東征集目錄

卷一

上滿制府論臺灣寇變書

與制府論進兵中路書

與施提軍論止殺書

檄臺灣民人

六月丙午大捷攻克鹿耳門收復安平露布

鯤身西港連戰大捷遂克府治露布

擒賊首朱一貴等遂平南北二路露布

檄外委守備陳章撫擒逸賊

檄南路營進兵阿猴林

卷二

檄查墾甲流民

檄擒舊社紅毛寮餘孽

檄施恩陳祥諭撫杜君英

檄南路營勦捕石壁寮

檄諸將弁大搜羅漢門諸山

檄北路將弁分搜小石門諸山

檄查大湖崇爻山後餘孽

檄諸將弁搜捕竹仔腳逸賊

檄下加冬李守戎

檄淡水謝守戎

卷三

覆制軍論築城書

與制軍再論築城書

與臺灣道府論殺賊書

答道府論陳福壽入山書

覆制軍臺疆經理書

覆制軍遷民劃界書

論臺變武職罪案書

論劉得紫書

卷四

論臺鎮不可移澎湖書

覆將弁矜功歛望書

論舊兵停餉撤回內地書

論征臺壯丁停餉歸農書

請班師書

覆軍前將弁可當大任書

請寬楊姓株連書

論哨船兵丁換班書

復呂撫軍論生番書

請行保甲責成鄉長書

請權行團練書

卷五

料三林逸賊逃歸內地請移廣省擒捕書

論下加冬半線二守備書

論蘇榮書

論諸弁書

論周彩書

論蔡奕陳祥送考軍前弁缺書

論臺中時事書

論擒獲奸匪便宜書

論復設營汛書

與朱叅戎札

與林遊戎札

諭閩粵民人

卷六

紀十八重溪示諸將弁

紀虎尾溪

紀水沙連

紀竹塹埔

紀火山

紀荷包嶼

紀山後崇文八社

覆臺變殉難十六員看語

覆臺變逃回澎湖押發軍前効力奉叅解任十

六員看語

覆臺變在事武職四十一員看語

欽定四庫全書

東征集卷一

廣州府知府藍鼎元撰

上滿制府論臺灣寇變書

臺灣僻處海外狃於治安久矣朱一貴突爾跳梁戕害
官兵竊踞郡縣雖曰猖獗之極其實不難平也無賴子
弟偶爾烏合尚未知戰守紀律為何事當即命將出師
星夜進討如揀焚拯溺勿容稍緩彼不意官兵猝至必

將手足忙亂倉皇散走渠魁大憝自可聚而殲旃此迅雷不及掩耳之道也若俟奏報請

旨而後發兵動逾數月賊胆必大規模漸立謀士漸出羽翮漸成則燎原之火正須大費撲滅耳控制臺灣惟廈門最為扼吭形勝所在便于指揮執事在省隔遠莫如疾驅南下駐劄廈門督師進剿籌畫糧餉諸凡機宜呼應便捷且內地莠民不無乘虛鼓煽或謀嘯聚搖惑人心若檠戟一臨則羣疑自息執事曠世鴻才必有奇

謀上計滅此朝食非鄙人所能窺測惟是養軍千日用
在一朝

國家不吝爵祿施及下材未有毫毛小效補報萬一敢
以此疆彼界之殊非在職守之內袖手縮頸晏坐而旁
觀哉願執事假某水陸萬軍舳艫三四百艘請乘長風
破千里浪為執事一鼓平之

與制府論進兵中路書

伏承憲檄令某統兵向南路打狗港攻入臺灣當即繕

治舟師刻期進發緣打狗港水淺灘淤戰艦繒艫槩無所用須盡易舢板頭艖子小船乃可入也登岸旱田百餘里夾道蔗林處處可容伏兵非焚燒剗平未便輕進臺民以蔗為生糖貨之利上資江浙一旦火成焦灰半歲勤動不得以養其家口於心竊有未安况當寇賊蹂躪之餘撫摩噢咻尚恐稍緩不應復有此一摧殘某非敢以婦人之仁阻撓軍國大計但軍國大計不在於斯則摧殘無益為可惜也鄙見以為宜聚兵中路直攻鹿

耳門鹿耳一收則安平唾手可得賊失所恃郡治無城
豈能長守不過三五日間可翦滅耳用兵之道知彼知
已與能軍者戰則宜攻其瑕討罪捕賊如逐鳥獸宜堂
堂正正直擣中堅譬諸擊蛇先碎厥首其他復何能為
乎鹿耳門暗礁天險昔立六竿標旗指示途徑南標紅
旗北標皂旗賊已盡收標旗屯兵砲臺扼守港道意我
軍不能飛越正可於此出奇制勝仍令善水者以長木
没入海中插標而行擊敗砲臺屯兵即可長驅直入恢

復之計止在瞬息惟執事急裁度之苟利
國家勿厭狂瞽望速示下以便遵行

與施提軍論止殺書

賊衆至三十萬此曹可勝誅哉勿論挺而拒敵即使安
坐偃卧引頸受戮我軍萬六千人以一人斬二十級亦
不勝其煩也彼亦天地父母之所生不幸與賊共處此
土耳畏死脅從知非本願或挂名賊黨以保身家其心
豈不願見太平重為

朝廷之赤子一旦大軍登岸渙散歸農篋壺迎師皆所
必至惟慮崑岡炎火不容悔罪歸誠此則出于萬不得已
者矣多殺生靈其實無益諒亦仁人君子之所不忍
聞乎以某愚見止殲渠魁數人餘反側皆令自新勿有
所問則人人有生之樂無死之心可不血刃平也某已
大書文告先散其黨惟執事許之勿疑

檄臺灣民人

檄告臺灣民人土賊朱一貴作亂傷害官兵竊據郡邑

汝等托居肘下坐受摧殘無罪無辜化為醜類深可憐
憫本鎮總統大兵會同水師提督施尅期勦滅為汝等
蕩滌邪穢共享太平非有立意殺戮苛求於百姓之心
汝其自安無畏臺灣海外窮島野番木魅蟲蛇鹿豕之
所居住時島彝海寇踞為窟穴我

皇上登之版圖冠裳而富庶之四十年來強教悅安深
仁厚澤淪洽肌髓汝等父老子弟莫不含哺鼓腹幸生
太平朱一貴內地莠民為鄉閭所不齒遁逃海外鑽充

隸役又以犯科責革流落草地飼鴨為生至愚至賤之
夫謂可與圖大事乎附和倡亂之徒皆椎埋屠狗盜牛
攘雞等輩以及堡長甲頭管事各衙門吏胥班役曾有
正人豪傑才俊與於其間乎由來亂臣賊子皆膺顯戮
雖強如莽卓狡如孫盧無不駢首就誅沈淵滅族況此
小盜賤役智能不及中人輒敢公然造孽欲作夜郎于
海外冀腰領之苟全無是理也浙閩總督覺羅滿躬親
駐廈督師討賊移檄浙江廣東三省會勦旦暮即至水

師提督施親率大兵見在澎湖尅日進發本鎮總統萬
軍前驅清港縛雞豚於籠中嚮鼠雀於鼎鑊至則屠之
何難之有惟念汝等賢愚不一或有抗節草澤志切同
仇或不得已畏死脅從非出本願若使崑岡炎火無分
玉石誠恐有乖

朝廷好生之德且非本鎮靖亂救民之心為此不追既
往咸與維新凡汝士庶番黎莫非

天朝赤子嚮風慕義悔罪歸誠回生良策刻不容緩大

兵登岸之日家家戶外書大清良民者即為良民一槩
不許妄殺有能糾集鄉壯殺賊來歸即為義民將旌其
功以示鼓勵廢弁舊兵有立功破賊率衆來迎並略前
愆敘績超擢凡擒朱一貴者受上賞擒賊目者次之獻
郡邑者受上賞獻營壘者次之惟拒敵者殺無赦倒戈
退避革面為農皆許之汝等試思一隅小醜萬萬不能
與

國家抗衡前此鄭氏盤踞數十年經歷三世人才衆多

兵精糧足尚且一朝殄滅今諸草寇又非鄭氏之比天
兵一到如雷如霆無得執迷不悟自取糜軀此檄

六月丙午大捷攻克鹿耳門收復安平露布

蓋聞金屋瑤臺非穿窬可負而走重洋天險豈醜類可
奄為巢惟海國之臺灣乃王家之屏翰地則龍蟠虎踞
屹立扶桑暘谷之間門開鹿耳鯤身遙扼呂宋荷蘭之
吭我

皇神武遠邁軒虞日月照臨遐荒暨訖既已披荆斬棘

消魃魅而入版圖亦且教稼明倫化蒼黔而躋文物四
十載噢咻生息億萬年含哺鼓歌朱一貴以飼鴨鄙夫
狡焉倡亂杜君英以傭工客子肆其狂謀遂合兩地賊
兵膽造滔天罪孽周應龍赤山之敗苗景龍南路之禽
承突狼奔蹂躪郊郭於是鎮協血戰盡瘁以殉封疆將
弁捐軀懷忠以報社稷全郡陷沒生靈遭殃爾乃沐猴
而冠欲做人家拜跪登場作戲妄擬海外王公據我倉
廩開我府庫居我官廨朕我人民草木為之怒號山川

於馬失色本鎮奉檄討賊總統水陸萬軍遵制府之機
籌合提軍之調度六月癸卯自澎進兵丙午黎明咸集
鹿耳先鋒林亮董方忠勇冠乎三軍雄威溢於六艘直
驅精銳大戰洶濤本鎮親率叅將王萬化林政遊擊邊
士偉朱文等八十餘員統領官兵指揮舸艦並趨進港
賈勇爭先巨砲雷轟震疊而山崩地坼輕舟驚擊奮揚
而瓦解灰飛白刃雜以火攻烏合因而獸散賴

皇上威靈波臣効順潮水漲高八尺好風利自西來連

鯨並前礁石無犯遂奪天險攻克鹿耳門林亮董方首
先登岸奪取砲臺焚賊營汎伊時日方及午乘勝進攻
安平遊擊林秀薄有成氣吞勁敵守備魏大猷葉應龍
目無堅壘命同前鋒先驅擊賊蠢爾鄭定瑞尚逞螳臂
以當車坳矣蘇天威欲藉豚威而咋虎我軍鼙鼓動地
旌旗蔽空林亮董方復先登岸本鎮親率王萬化林政
邊士偉朱文謝希賢魏天錫郭祺王紹緒胡璟范國斗
齊元輔鄭耀祖金作礪李祖呂瑞麟洪平康陵劉永貴

蘇明良等各官兵如熊如羆如飛如翰寶刀怒舞賊血
濺紅平沙鎗砲連環僵屍填滿水涘飄乎狂風掃秋葉
快哉烈焰燔蜂窠遂登安平鎮城豎立大軍旗幟安平
百姓箪壺迎師載道歡呼復見天日本鎮詢問疾苦嘉
與維新嚴飭弁兵秋毫無犯一日三捷猛氣上騰層霄
二險連收脚跟已踏實地從茲城壘可據進戰退守皆
安港道得通兵糧來往均便旦日圍勦立見削平滅楊
么於洞庭尸表甫於東市移山壓卵間內不煩再舉之

師覆海漂煨軍中共慶膚功之奏謹大書露布告中外
聞知

鯤身西港連戰大捷遂克府治露布

惟丙午之大捷收鹿耳與安平戰艦蜎泊於臺江弁兵
雲屯乎城闕立營設砲分扼要害之衝稱戈比干共震
暉焯之盛詰朝丁未水師提督施樓船進安平港時維
已刻一貴遣羣賊列陣來四鯤身本鎮躬督大軍左右
迎敵關如琥虎氣吞賊魄八千矯若游龍威懾臺黎百

萬林邊王鄭諸將犁陸直攻朱林魏呂各員盪舟夾擊
追奔逐北至七鯤身涉水行沙遂掃瀨口翌日分遣將
校沿江撐駕小船運載硝磺雜裝茅葦乘西南之風烈
用諸葛之火攻火箭火龍空中飛舞賊踪賊艘觸處焚
燒已酉黎明賊衆數萬冒死決戰直犯安平植木盾於
牛車聯成陣勢繪青旗以黑蟒誇詡精鋒我師威武奮
揚左翼右翼一人可以當千大砲連環齊發陸軍水軍
三矢仍看餘二屍填巨港京觀等于雞籠戈倒沙灘棄

甲齊于龜佛自是賊人破膽不敢再出鯤身守險拒江
待吾師老本鎮分兵西港暗渡竿寮遇賊七千餘人大
戰於蘇厝甲俄而近村四出敵衆漸增雜遘荆榛彌漫
數萬前鋒軍林亮魏大猷等用命爭先左右軍林政邊
士偉等奮力衝殺胡璟等以奇兵繞賊陣後首尾夾攻
呂瑞麟以遊兵突出竹林橫截賊陣本鎮悉驅精銳自
將中軍鎗砲震天鼓輦動地大敗賊衆獸散土崩俘馘
斬傷不可勝計癸丑揮兵南下沿途廓清凡遇兇頑輒

行勦滅乃敗之於木柵仔復敗之於萬松溪朱一貴捨命奔逃率其黨顛連北去本鎮先復臺灣府榜諭安民掃肅

萬壽亭收捕逸賊先是水師提督施傳令將弁尅日攻府林秀王良駿等從七鯤身瀨口進兵朱文謝希賢等從塗墜埋大井頭殺入並於本日巳刻與本鎮會兵府治臺灣百姓復見太平感激涕零咸呼

萬歲寇亂五十餘日恢復無須決旬士庶民番仍為

朝廷之赤子山川土宇依舊

皇家之版圖智武之滅偪陽方斯迅速新建之平寧逆
尚訝濡遲皆賴

皇上神威將士効力提軍調度制府運籌是以克奏膚
功不勞而定夫豈本鎮薄劣所能及茲南北路賊營已
空明朝遣吏士收復二邑朱一貴亡命村落即日令卒
徒縛送檻車中外永清官民胥慶特申露布飛馳以聞
擒賊首朱一貴等遂平南北二路露布

惟辛丑六月二十有三日本鎮總統官兵克復臺灣大
張文告與民更新為殉難將帥討賊復仇梟磔元兇招
徠市肆宥罪恤傷詢問疾苦乃會同水師提督施遣兵
追勦逸賊分攻南北二路以林秀薄有成郭祺齊元輔
范國斗胡璟李祖劉得紫鄭文祥劉永貴董方林君卿
游全興等帶領官兵窮追朱一貴諸賊以王萬化林政
邊士偉魏天錫攻取南路營鳳山縣以朱文謝希賢呂
瑞麟洪平閏威攻取北路營諸羅縣以景慧收復笨港

林亮魏大猷率舟師北上平定沿海一帶地方指揮已
定刻日過征犀甲熊旗耀若長虹四出金戈鐵馬閃如
怒瀑齊飛越五日戊午林秀諸軍遇賊于大穆降追奔
逐北炎火之熱飛蓬斬將擐旂豪鷹之攫爰免賊遺車
馬器械堆積如山餘黨潰散歸降十去其九朱一貴走
灣裏溪我軍追至茅港尾鐵線橋收復鹽水港一貴夜
遁下加冬絕食月眉潭狼狽星散不及千人乃有義民
王仁和楊石密受本鎮外委守備銜劄與楊旭楊雄倡

率溝尾等六庄鄉壯計謀擒賊閏月七日丙寅楊旭楊
雄誘賊至溝尾庄是夜雞鳴火炮震天金鼓動地六庄
鄉壯喊殺攻圍遂擒賊首朱一貴及其黨王玉全翁飛
虎張阿山縛置牛車馳解軍前五十日自大夜郎王囚
首叩階除之石卅萬衆偽稱國公府拽頸雜羊豕之羣
餘孽雖奔天網不漏臬楊來於大排竹竿首級于十字
街林曹林騫林璉鄭惟晃張看張岳等咸向我軍面縛
乞降復擒吳外李勇陳印陳正達盧朱等皆繫長纓以

為俘馘渠魁黨羽無不械送就誅脅從爪牙一盡烟消
靡子王萬化諸軍至南路擒斬賊目鄭定瑞顏子京等
收復鳳山縣安撫下淡水各處庄社民番南路五百里
地方悉皆恢復蕩平朱文等諸軍至北路擒斬賊目萬
和尚等收復諸羅縣安撫哆囉囑斗六門各處庄社民
番景慧引兵至笨港林亮魏大猷以舟師來會遵海上
下掃除賊藪招輯流亡而援淡遊擊張駸守備李燕劉
錫千總李郡淡水營守備陳策等引兵南下半線謝希

賢引兵北上與張駭等會合北路千餘里地方盡皆恢
復蕩平掃逆寇于一朝根株悉拔奏膚功于旬日山海
牧寧從茲鹿耳鯤身永鞏東南之鎖鑰雞籠沙馬長固
陬澁之藩籬咸知盜賊不可為即竊州踞縣終當橫分
腰領犯亂不可作雖道寡稱孤畢竟坐受誅夷起普天
忠愛之心寒千秋叛逆之膽桓桓熊虎厥有微勞忻忭
曷勝馳聞敢後

檄外委守備陳章撫擒逸賊

南路惡賊陳福壽劉國基薛菊王忠等聞我師克復臺
郡望風遁逃至今未獲當日附和倡亂此曹實為渠魁
偽稱國公虔劉郡邑復率賊徒數萬攻掠下淡水客庄
幸我義民制梃禦敵斬殲萬計而元兇未禽天網尚漏
今遁入深山勢窮力蹙偷生無路該弁其往緝之傀儡
內山多生番賊不敢進大抵在九姜阿猴林左右不然
則大崑麓以下極遠不過郎嬌遣諜踪跡無不得者按
其滔天罪逆雖竿首尚有餘辜但國恩寬大統賜矜憐

若即就撫諒原其罪此亦諸賊改邪歸正起死肉骨之日也該弁密偵所在宣布

皇仁許以不死併所有餘黨俱來投生倘尚執迷不悟或擒或誅總為該弁勲績本鎮並懸爵賞以待勉之

檄南路營進兵阿猴林

漏下三鼓接訪事差弁密報阿猴林有賊數百人在彼豎旗作孽係偽國公江國論為首旗幟飄揚林木間發兵勦捕不可易也郡城出師招搖耳目且相去百數十

里自必聞風先遁徒勞無益江國論賊中狡猾凡事虛

張計自打猫蹂躪客庄

打猫諸羅縣村社名

不過一二千賊聲言

數萬地方驚惶被殺客民七八百人我師入府北路居民欲食其肉賊黨散盡國論逃竄入山從行不過百人顛崖墜谷餒斃坑澗不知凡幾距今兩月糧食全無投生靡路乃狼狽扶攜潛由大武壠羅漢門而趨阿猴林冀南路人不知底裏或可於此謀食苟延旦夕之命安所得數百人而附之然君子小心雖微不忽明知其無

數十人不可不作數百人之備該營相去不遠可即遣中軍守備帶兵二百名捲旆疾趨直搗阿猴林將山中所有逸賊盡行殲滅江國論鄭元長二名實為渠魁或被鎗砲傷斃則截其首級來報倘山中闕其無人止係虛張聲勢不可便即回營且陽退而陰繞間道以待遣人偵左近山谷峒窩必有三五人或十數人則江國論已在其中急擒勿失以吾所料不過如此該將弁神而明之相機度勢搜尋勦捕或奔投我師求撫乞命亦與

借來本鎮但欲綏靖地方原未嘗立意嗜殺也該營進
兵以速為要尅限本日亥時出師明日辰時務到阿猴
林不許違悞時刻違者軍法治罪此檄

東征集卷一

欽定四庫全書

東征集卷二

廣州府知府藍鼎元撰

檄查學甲流民

日者風聞學甲地方有游手客民數十成羣風餐露宿
往來徙倚大埔間如焚林之鳥偶語替替恐係失業流
民抑或匪類潛蹤均之未可定也叛亂既平撫綏宜亟
該弁其往視之傳集彼處鄉保甲民細詢此等來歷併

近日作何舉動有無招誘為非果係良民速令各回本
庄安生業焉倘緣兵燹之後流離無依即將苦情據實
來告當即會商臺鎮道府開倉賑貸設法安插無致失
所願住某鄉願入某甲農工負販願何資生一一皆從
其便但彼等皆自內地來臺父母兄弟妻子俱在原籍
變亂存亡家莫聞知似當迅速言旋慰猶來無死之望
其有願回內地立給印照助之便船聽其回籍俾得室
家團聚諒有人心不忍復濡遲也速以此意遍諭無忽

檄擒舊社紅毛寮餘孽

風聞舊社紅毛寮地方有賊首黃輝卓敬等招誘鄉民聚謀為亂聲言羅漢門阿猴林諸處有王忠等數千人接應尅日攻府其說甚謬王忠亡命山谷止二三賊相從晝伏夜奔飢餒無所得食勿論人衆數千即百人亦無有也輝等食飽福薄自尋死路意在誑惑鄉民墮彼術中此時哀鴻甫集驚魂未定目覩朱一貴三十萬人王師一至皆化蟲沙早已知盜賊不可為矣即使果有

王忠數千人尚未及曩賊百分之一民雖至愚豈肯復犯鋒鏑與之偕死于無名哉但輝等既有此謀則法所必誅招黨方新逆勢未集作速掩捕如縛雞豚該弁各以兵百人分道入按緝之止擒渠魁二人不必株連餘黨驚擾百姓有持軍器拒捕者誅之其他皆為良民無得過問弁兵自備餼糧不許派累飯食及竊取民間一草一木如違定按軍法此檄

檄施恩陳祥諭撫杜君英

杜君英久處山中晝伏夜走終無了期寂寂深林餓糧
莫繼茫茫大海插翼難飛不旬日間將為蒿下枯骨矣
本鎮哀其愚懵仰體

朝廷好生之德欲為網開一面該弁賞斯檄往諭之自
古君臣大義無所逃於天地之間是以作亂之賊咸膏
斧鑕苟可改過自新即為彌天大幸

國家寬仁溥博汝等匪類皆許歸正見奉有若即就撫
諒原汝罪之

恩旨浙閩總督覺羅滿檄委候選通判何廷鳳來臺招撫有杜君英若降題授副將之語君英其亦聞之矣所以逡巡畏縮未敢出歸正者懼誅耳

朝廷既許弗誅總督復不忍誅馬下殺降本鎮又不為也君英悔悟來歸何誅之可懼從來國法所加必于窮克怙惡不在多殺一二無用之人君英昔日作亂有黨十數萬人不可不殺今隻身亡命父子流離窮蹙無所依歸如犬彘螻蟻罔關輕重殺之不足以樹威則不殺

亦無不可也但本鎮總統大兵殺賊安民是其專責斷不容山陬海澨尚有竄身草澤伸頭縮頸於光天化日之中貽地方以去惡未盡之謂君英一日不出本鎮一事未了不殺不休君英既出就撫則為

朝廷之良民本鎮不得擅殺但靖疆以報竣事便可班師去矣君英靜夜自忖山中能住幾時出則生不出則死此理甚明有何疑義陳福壽江國論劉國基薛菊等皆君英同黨叛逆之人罪應滅族先後來歸俱皆不殺

美衣豐食炫耀街衢君英寧獨異乎且君英福壽誓同
生死福壽今為良民逍遙自在君英一出便可同生何
事株守空山自速其死以負初盟君英懼誅疑團未破
獨不可向陳福壽一商酌乎本鎮言出如山要殺便殺
不殺便是不殺豁達爽快可對天日若詐誘人降而復
殺之以為功此不肖小夫之所為而謂本鎮為之乎况
即殺君英亦莫不得功績日前臨陣斬獲不知凡幾俱
皆不以為意復何有于孤窮垂斃之一賊而欺而殺之

祇足為天下笑何功之可言君英靜夜三思山中能住
幾時出則生不出則死死生惟汝自擇本鎮不相強也
該弁賞檄往諭無得妄動君英降則與俱來不降則聽
之去不許擅殺因檄諭而殺之仍是詐誘故智非大公
至正之道也該弁自歸本鎮別遣人取其頭來君英勿
悔

檄南路營勦捕石壁寮

南路餘孽復叛有衆監旗于石壁寮嗟此兇頑不殺不

已本鎮雖極好生亦未如尋死者何矣督標千總何勉
差委在南訪緝逸賊該弁素有幹才膽畧亦優實心任
事以之勦捕是其所長該營撥兵二百名令把總杜雄
與偕各率百人分道並進尅限本月初五日戌時潛師
出境夜抵石壁寮以漏盡直搗賊窠四面圍殺料羣賊
尚在夢中手忙足亂人不及衣鎗不及火頃刻間可殄
滅也若至黎明則裝束已興奔逸較易恐不能無漏網
之虞搜山追勦又費一番勞動矣無得濡遲慎速慎速

檄諸將弁大搜羅漢門諸山

臺民以倡亂為嬉豈真不知刑戮之可畏由大山深險
而逋逃之數多也成則出為民害敗則去為山狙人跡
不至莫窮其底彼何憚而不為哉夏季大亂削平渠魁
咸縛秋間尚有阿猴林鹽水港六加甸舊社紅毛寮諸
孽後先嘯聚屢經擒捕竿街舊逃之偽國公陳福壽杜
君英江國論等十數賊目亦俱招納歸降新舊根株殆
將悉絕不意近日復有匪類豎旗于南路石壁寮隨發

弁兵追勦立獲蘇清高三二賊供稱薊瓜成為首共黨夥二十八人旦暮當盡縛之不足煩師徒也但逋藪不清萌蘖終發諸賊往來南路阿猴林下淡水間其窠總在羅漢門乘此隆冬澗涸茅乾土燥之候大舉圍搜掃蕩穴窟諸將其各礪刃裹餽遵吾軍令刻日進兵為一勞永逸之計今遣提標遊擊王良駿金門鎮標遊擊薄有成南灣守備呂瑞麟共帶領征兵六百以土番五十名為鄉導從角宿岡山刈蘭坡嶺一路搜入羅漢門署

南路營守備閔威帶領南路兵四百鄉壯一百土番五十由仁武庄土地公崎阿猴林板臂橋搭樓一路搜入羅漢門金門守備李燕烽大門守備蔡勇共帶領征兵四百土番五十由卓猴木岡社一路搜入羅漢門尅于是月十二日午刻咸會內門中埔庄毋敢後至違者按以軍法另遣臺鎮左營把總林三中營把總陳雲奇共帶領汛兵二百鄉壯八十土番五十前往大武壠分路堵截以防賊竄北路營把總游寬下加冬把總鄭榮才

亦帶汎兵二百往大武壠堵截搜捕俱尅于十二日午
刻咸會大武壠之礁巴哖毋敢後至違者按以軍法翼
日黎明俱各分兵搜捕羅漢內門諸將備分搜銀錠山
內門嶺內埔佳白寮打鹿埔霞美林東方木小烏山南
馬仙龜潭烏山尾等處逢人執訊遇窠燒毀焚山烈澤
窮極幽深大武壠諸弁目分搜礁巴哖鹿駝庄望郎明
郎包米茭拔埔大湖大龜佛內郎包烏山內等處凡有
巖谷無不遍尋直使蠢爾奸頑更無藏身之地駢首就

戮絕無竄逸之區倘有悔罪求生束身歸命仍貸其死
開乃更生之路亂後餘孽自古蔓延必有一番震盪方
能掃滌淨盡可從此卧鼓戢戈無死灰復燃之患也其
師旅所過庄社地方秋毫無犯敢有擅動民間一草一
木即按軍法領兵官約束不嚴飛章叅革治罪本軍門
令出如山萬萬不可轉移各宜抖擻精神凜遵毋忽

檄北路將弁分搜小石門諸山

聞諸羅東偏大山之中小石門得寶寮竹頭崎三層谿

等處有奸宄嘯聚百人操械往來其間晝伏山窩夜出行劫此漸不可長也涓涓不息將為江河會兵勦捕確不可易汝諸將弁無以山深路險畏難苟安聽吾號令滅此而朝食耳今約分兵三路尅日並進山徑窄狹士卒在精不在多每一路遣精兵百人鄉壯七十土番三十操弓挾矢為鄉導又就中分作三隊漸次而行俾前後遙相照應其令把總鄭高率兵番鄉壯二百名向赤蘭坡進發從三塊埔深坑仔搜捕而入直搗竹頭崎會

小石門署守備李郡把總林時葉各率兵番鄉壯如數
時葉從大排竹土地公崎進發搜三層谿等處李郡從
糞箕湖仙草埔進發搜得寶寮大石門等處咸會于小
石門務必陟遍巖阿窮極幽谷燬山中之草廩掃賊人
之窟穴果有匪類出沒立即揮兵掩捕敢拒敵者殲之
又山中有羊腸鳥道可由十八重溪通大武壠而之羅
漢門今遣把總莊子俊蘇思維率兵二百名前往大武
壠扼其吭就撥礁巴咩社番一百名弓矢引道前驅於

大湖山路口小籬路口分兵堵截以防逸盜無令逃竄
計諸路並進圍搜設伏截擒更無奔逸之地前不敢出
後不敢入賊在吾掌中矣但兵貴神速機在謹密幸無
濡滯洩漏使賊聞風而先遁惟諸君慎之慎之

檄查大湖崇文山後餘孽

日者鄭固就擒逆謀潰敗南路餘孽將從此永清矣據
供王忠等有黨千人在內山大湖崇文山後賊口譁張
雖未足據為憑信然不可以不防也其令千總何勉把

總康賜由羅漢門大武壠分道並入直抵大湖採探有
無匪類蹤跡併熟視進兵路徑果有窠巢即大舉撲滅
之耳山後地方有崇文卑南覓等社東跨汪洋大海高
峰插天巖險林茂溪谷重叠道路弗通苟有賊黨嘯聚
往來番黎無不知之其令外委千總鄭惟高率健丁十
數人駕舟南下由鳳山郎嬌至沙馬磯頭轉折而東賞
檄往諭卑南覓大土官文結賞以帽靴補服衣袍等件
令其調遣崇文七十二社壯番遍處搜尋將山後所有

盜賊悉行擒解按名給賞拒敵者殺死勿論凡擒解山中漢人一名該番賞布三十尺鹽五十斤烟一斤獲劇賊者倍之有能擒獲王忠當以哆囉哱哱吱銀兩烟布食鹽等物大加犒賞諸番黎盡心搜緝餘孽應無容身之地也番性嗜殺本鎮不得已而用但山後大湖地方乃自開疆以來人跡不到之境當今並無甲籍居民所有逋逃總非善類殲之亦不妨耳窮深極遠兵不可入番黎趨捷如飛靡幽不到使之甚便擒縛以來如市貨

物縱有一二漏網而山中既不可居待其出而擒之如籠中之鳥釜中之魚烏有不滅者哉其各努力以奏爾功無忽

檄諸將弁搜捕竹仔腳逸賊

據報初九夜有奸宄一二百人旗幟甚多經過竹仔腳地方戕殺塘兵蘇天貴陳楠等四名竹仔腳去諸羅邑治不過咫尺間耳何物奸徒乃敢夜張旗械搶殺塘汛來莫覺其所自去莫窮其所歸不知附近弁員所司果

何事也孽醜放肆至此已極若不大加創懲養癰貽患
成何軍紀料此賊來由不遠大抵在虎尾八掌溪上下
張四面之網而搜而捕之烏有不獲者哉其令署守備
林君卿以兵截其北扼住半線鹿子港署守備李郡以
兵截其南扼住下加冬鹽水港叅將朱文控扼諸羅山
一帶千總吳濟川巡守斗六門把總張天寶陳雲奇帶
兵堵截東西螺山路無令奸宄逸入山中守備劉錫以
兵駐劄笨港巡守沿海一帶無令逸入海中協防遊擊

林秀都司閔威各率所部兵二百名於中間往來搜捕
諸羅縣遣典史巡檢挨查家甲將蹤跡可疑之人細為
盤問仍懸賞格曉諭通衢首報獲真盜一名賞白金十
兩自首者免罪能擒夥黨立功從優加賞不寬不擾無
枉無縱夜則分兵埋伏要路堵截擒捉如有奸徒聚眾
執持旗械領兵官立行追勦務必盡數俘獲毋得遲回
觀望違悞軍機汝等各營將弁聞本鎮軍律有素尤必
嚴束兵丁自備行糧毋得派累民間飯食及擅動草木

鷄犬違者軍法治罪各宜凜遵毋忽

檄下加冬李守戎

據報該弁追捕奸匪深入山中北埔寮與賊人對敵生擒渠魁李慶等奪賊旗械二十六桿收回所劫鄉民贓物焚燬窩廬披閱之下深為莞爾該弁深阻前驅罔憚勤勞克敵致果可謂能盡職矣繼閱諸羅令申文則據鄉保長廖督等稟稱賊廬五間內積米糧百餘石該弁傳令焚燒果有此事又可謂知兵法矣從來敵遺貨物

不可輕取恐兵丁貪獲所有隊伍散亂萬一賊人反攻無心戀戰鮮有不敗諛弁追捕克勤又能知兵若此本鎮誠為喜而不寐也但所稱賊廬五間是否新造抑係久居於此每廬深廣幾丈尺能容人衆幾何鍋竈幾所碗箸食飲之具可供幾人廬中糧食實在屯積多少是粟是米果否一盡焚燒抑或兵丁鄉壯尚有取攜而去所收回賊劫贖物牛幾頭鷄豕犬羊幾隻衣服布帛首飾銀錢幾件數曾否俱還失主收領抑移交諸羅縣令

分發逐一開明備細據實報知本鎮將因此以卜賊人多寡出沒之數非于該弁有所苛求也洞達蹤跡則可窮極幽深掃清根柢地方之福該弁勞績匪小耳隨行目兵分別功次併紀其名氏以來將有以獎勵之無忽檄淡水謝守戎

昨擒獲孽醜黃來供稱臺灣山後尚有匪類三千人皆長髮執械屯聚山窩耕田食力又有艘艦往來其詞甚謬本鎮治賊素嚴黃來既獲自料必死故為危言以延

數月之命豈有他哉然君子思患預防明知其為謬妄亦不得以其謬妄而忽之臺地二千餘里止論山前西南北一帶本鎮耳目之所及不過上窮淡水雞籠下盡郎嬌至矣極矣其自淡水雞籠以上轉折而東至三朝蛤仔難下逮崇文卑南覓沙馬磯頭迴環郎嬌一帶山後延袤大略與山前等其間道里遠近山川形勝阨塞險夷以及番黎情狀性習馴悍本鎮不能周知其詳也安保深山大澤之中人民足跡不至之地無有匪類出

沒乎曩者南路擒獲鄭固亦稱王忠逃匿山後大湖有
黨千人本鎮經遣弁員賫檄往諭卑南覓大土官文結
鼓舞七十二社番黎以兵搜捕將山後所有逸賊盡縛
以來苟有王忠在彼網不漏矣今惟鷄籠以及蛤仔難
下抵卑南覓北界搜捕未周併未遣有偵緝之人該弁
營汎壤與相接此任舍子誰屬耶查大鷄籠社夥長許
略干豆門媽祖宮廟祝林助山後頭家劉裕蛤仔難夥
長許拔四人皆能通番語皆嘗躬親跋涉其地賸社和

番熟悉山後路徑情形該弁其為我羅而致之待以優
禮資其行李餼糧之具俾往山後採探有無匪類屯藏
巖阿窮極幽遐周遊遍歷倘有游魂伏莽立即飛報以
聞本鎮調遣官兵端臻勦滅無許偶留根株以貽地方
之害但恐許略等或有畏遠憚行弗克殫心竭力潛蹤
近地飾言相欺斯亦不可不慮者該弁披肝膽以誠告
之更選能繪畫者與之偕行凡所經歷山川疆境一一
為我圖誌自淡水出門十里至某處二十里至某處水

陸程途詳記圖上至蛤仔難接卑南覓而止百里千里
無得閒斷某處某社某山某番平原曠野山窩窟穴悉
皆寫其情狀註其名色使臺灣山後千里幅員一齊收
入畫圖中披覽之下瞭如身歷重賞酬勲本鎮無所吝
焉山後廓清是亦該弁一勞績也即日舉行無為猶豫
慎速慎速

東征集卷二

欽定四庫全書

東征集卷三

廣州府知府藍鼎元撰

覆制軍論築城書

築城鑿濠臺中第一急務當星速舉行者也承諭但任官兵不用議及民居乃因時制宜節用愛人至意第思設兵原以衛民而文武衙署倉庫監房俱關重大似未可但護兵丁而置其餘于度外也盜賊小人耽耽之視

惟在帑金而同夥囚繫則謀劫監越獄情所必至倉卒之際以官為主官無恙則法尚存未敢遽掠民居而民亦無驚擾潰散之患此定理也官無大小失一則羣情慌亂而賊志張揚兵威挫衄故謀事必出萬全雖不能多及民居亦當合文武衙署倉庫監房包裹在內乃可戰可守可以言城若謂兵既減少城大難于照看則內地各府縣戍守之兵或千或百皆有包羅衙署民居之城况兵既二千亦不為少有急則住眷良民皆可登陴

協守似無照管不周之弊但土城木城職等再四籌咨
未見其可臺地徹底粉沙築之不堅膠之不實欲依憲
諭以挖濠之土不灰不磚而成五尺厚二丈高之牆萬
萬不能牢固即使勉強堆築風雨一至立見崩墮將徒
勞而罔功此土寨之不可也深山伐木遠運以來所費
不貲承諭內外兩重植立以沙土實其中復用厚板蓋
頂則必深豎密布所需之木何啻山積雖暫時亦堪守
禦而歷久終歸朽蠹蓋木性乍乾乍濕逾年即壞既已

植築為城半埋沙土驕陽曝則膚理裂開雨露濡則腐
枯立見其勞民傷財不下灰磚而復不能以經久則木
寨亦未善也沙灰土三合築牆之寨此則可行灰可載
牡蠣之殼築窰自燒而沙土亦須運載蓋必粗沙如豆
米顆粒及山間實土方可和灰非此處細粉沙泥可用
則工本浩大與砌磚為城相去無幾職等愚見以為不
為則已為則必要于固土木即可權宜錢糧總無出辦
似不如明題請

旨就臺地特開捐輸城工事例于萬壽亭寬曠處所用
灰砌磚築一不大不小之城將文武衙署倉庫監房俱
包在內深鑿濠塹密布椿簽方為長久至計鳳山諸羅
營縣一例倣此行之不知執事以為何如一時之勞萬
世之利也職等凡庸識淺以為此事關係臺疆安危即
係國家東南沿海治亂似不可苟且塗飾惟執事留意
焉

與制軍再論築城書

於萬壽亭曠地築一小城建文武衙署倉庫於中尚是
畏難苟安之見因憲札內有兵民雜處難於稽查等語
故云然耳夫設兵本以衛民而兵在城內民在城外彼
蚩蚩者不知居重馭輕之意謂出力築城衛兵而置室
家婦子於外以當蹂躪夜半賊來呼城門而求救無及
矣論理宜包羅民居為是北從總兵大營後圍起環臺
灣縣署而東跨溝為水門遂包東獄廟臺灣縣學鳳山
公館南包郡庠防廳臺廈道公署西包天后宮番子樓

而北環左營遊擊營署計一週不過十里惟截出中營
萬壽亭春牛埔土塹埕渡頭在外其餘文武衙署學宮
城隍倉庫牢獄包括靡遺尚未及興化漳州郡城之大
其形勢則北跨高坡臨海東北當北路要衝東南控扼
南中二路南瞰鬼子山土塹埕西俯海岸鯤身安平鹿
耳為捍門方得建郡形勝其三面皆無民居止截斷土
塹埕一帶須清民屋但為地方大利亦不得顧惜小害
計算應毀房舍若干將節省營建衙署費用量直周給

所損少而所全多國家大事惟斷乃成幸即具

題請

旨開輸磚石城工事例諸羅鳳山皆可刻日行之不然
終是道旁築舍未見巧婦能為無米之炊權宜而用土
木偷安止在目前勞民傷財不能經久若止防衛官兵
俾蚩蚩者心寒而齒冷非經國安邊之道也統計宇內
全局則臺灣為海外彈丸黑子似在無足重輕之數然
沃野千里糧糈足食舟楫之利通天下萬一為盜賊所

有或荷蘭日本所據則沿海六七省皆不得安枕而卧
關係東南半壁治亂非淺也鄙見若斯惟執事裁之
察之

與臺灣道府論殺賊書

北路餘孽剽掠鹽水港豎旗六加旬恣其克頑目無王
章可恨極矣已經擒獲楊君林君李明等輩擬于明日
會訊分別斬馘茲聞尊議欲按律成招押解省城聽制
撫審題正法此常理也但某愚見竊有欲叅末議者安

靖地方原不必拘牽文法況在軍中無人人審解之例所謂得情哀矜施之良民則為德施之叛亂則為縱而况甫平思亂既赦復叛此曹尚可活哉今解入內地不能不扳仇復怨牽累無辜恐民間人人自危且上下審駁奏報往返動隔經年雖彼時萬刃碎礫民已忘記不知為何人何事矣目前冤憤不伸咨嗟詛記此聲曷可聞也海外反側地非樹威不足彈壓奸徒無所畏憚將何以為定亂之資詎可以仁慈之治治之吾于就撫者

加之恩力擒者棄諸市情法分明任其自擇庶可淨盡
根株耳旦日會審將梟示衆定人心而固疆圉有罪某
自當之軍中義得專殺無預諸君事也某非立意嗜殺
無仁人好生之心正惟好生不得不以殺止殺亂賊不
殺害及善良刑法將安所用而亂賊尚不可殺則又何
賊不可為將刑法亦不勝其用鄙見如此未知當否同
舟共濟勿吝相商某白

答道府論陳福壽入山書

承惠教以杜君英實為戎首此時尚匿山中頹側靡常
不宜輕遣陳福壽往與相見福壽罪大惡極為

國家不赦之人已經奏報就撫萬一復偕君英逃去則
身名隨之具見足下愛我之深甚為感謝但某亦嘗思
之福壽不往君英不來一片疑團待此以決我輩至誠
待人奈何使人疑之料福壽已無去志即使君英搖唇
鼓舌無改於窮蹙顛連之狀安能使福壽舍安而就危
舍生而就死此必不得之數也况君英欲出自是實情

彼當倡亂之初聲勢猖獗更甚于朱一貴比及陷郡欲
與一貴爭王迨後吞併相攻敗走虎尾溪其衆尚四五
萬

王師入郡三日彼尚有八千人屯踞猶兒干今亡命至
此晝伏夜奔八千子弟俱歸何處即縱陳福壽與俱入
山無衣無食能再集八千人否即使招至數萬亦不過
如曩時君英終有今日則亦何益之有君英此時如夢
初醒斷斷不復出此也彼在山中奮飛無路聞江國論

陳福壽等美衣豐食優游自在早已心動欲出但恐為人所欺竿首市曹不過欲見福壽一問誠否實非敢有他念是以福壽雖病某亦令載牛車強遣之去又未嘗不為過慮密諭施恩陳祥當機相度或有他變則揮刀先斬福壽徐割其首級以報亦可以伸

朝廷之法然竊料君英必無異志明日午後當來請移大駕到此間會同質訊可也

覆制軍臺疆經理書

十月既望接到憲檄內開臺疆經理事宜八條翼日又奉諭札再加四條具見未雨綢繆為臺地蒼生謀善後之策職等自當遵命次第舉行亦有愚昧無知胸中未能悉達不得不略屬條奉上之文而講師生質疑問難之誼伏惟憲臺少加垂察臺灣海外天險治亂安危關係

國家東南甚鉅其地高山百重平原萬頃舟楫往來四通八達外則日本琉球呂宋噶囉吧暹羅安南西洋荷

蘭諸番一葦可杭內則福建廣東浙江江南山東遼陽
不啻同室而居比鄰而處門戶相通曾無藩籬之限非
若尋常島嶼郡邑介在可有可無間值茲寇亂風災之
後民生凋瘵大異本來富庶面目然風俗尚多澆惡奸
宄未盡革心網密則傷網疎則犯治安之政宜嚴而不
宜寬將安將治之民宜靜而不宜動伏讀憲諭羅漢門
黃殿庄朱一貴起事之所應將房屋盡行燒毀人民盡
行驅逐不許往來耕種阿猴林山徑四達大木叢茂寬

長三四十里抽藤鋸板燒炭砍柴耕種之人甚多亦應
盡數撤回蓬廠盡行燒毀檳榔林為杜君英起手之處
郎嬌為極邊藏奸之所房屋人民皆當燒毀驅逐不許
再種田園砍柴來往以上四條防患拔根至周至決職
等再四思維一人謀逆九族皆誅亂賊所居之地雖墟
其里可也惟是起賊非止數處數處人民不下數百家
則亦微有可慮者人情安土重遷既有田疇廬舍室家
婦子環聚耕鑿一旦驅逐搬移不能遍給以資生之藉

則無屋可住無田可耕失業流離必為盜賊一可慮也
其地既廣且饒宜田宜宅可以容民畜衆而置之空虛
無人鎮壓則是棄為賊巢使奸宄便于出沒二可慮也
前此臺地何人非賊國公將軍而外偽鎮不止千餘今
誅之不可勝誅俱仍安居樂業而獨于附近賊里之人
田宅盡傾驅村衆而流離之隣賊之罪重于作賊三可
慮也臺寇雖起山間在郡十居其九若欲因賊棄地則
府治先不可言况郎嬌並無起賊雖處極邊廣饒十倍

于羅漢現在耕鑿數百人番黎相安已成樂土今無故
欲蕩其居盡絕人跡往來則官兵斷不肯履險涉遠而
巡入百餘里無人之地脫有匪類聚衆出沒更無他人
可以報信四可慮也鋸板抽藤貧民衣食所係兼以採
取木料修理戰船為軍務所必需而砍柴燒炭尤人生
日用所不可少暫時清山則可若欲永永禁絕則流離
失業之衆又將不下千百家勢必違悞船工而全臺且
有不火食之患五可慮也疆土既開有日闕無日虞臺

地宋元以前並無人知至明中葉太監王三保舟下西洋遭風至此始知有一地未幾而海寇林道乾據之顏思齊鄭芝龍與倭據之荷蘭據之鄭成功又據之

國家初設郡縣管轄不過百餘里距今未四十年而開墾流移之衆延袤二千餘里糖穀之利甲天下過此再四五十年連內山山後野番不到之境皆將為良田美宅萬萬不可遏抑今乃欲令現成村社廢為坵墟厲禁不能六可慮也曩者諸羅令周鍾瑄有清革流民以大

甲溪為界之請鳳山令宋永清有議棄郎嬌之詳今北
至淡水雞籠南盡砂馬磯頭皆欣然樂郊爭趨若鶩雖
欲限之惡得而限之職等愚見以為人無良匪教化則
馴地無美惡經理則善莫如添兵設防廣聽開墾地利
盡人力齊鷄鳴狗吠相聞而徹乎山中雖有盜賊將無
逋逃之藪何必因噎廢食乃為全身遠害哉今竊議于
羅漢內門中埔庄設汛防兵三百名以千總一員駐劄
其地郎嬌亦設千總一員兵三百控扼極邊一帶三六

九期操演之外准其自備牛種就地屯田以為餘資雖險遠而弁兵便馬檳榔林在平原曠土之中杜君英出沒庄屋久被焚毀附近村社人烟稠密星羅碁布離下淡水營內埔庄汛防不遠無庸更議至各處鄉民欲入深山採取樹木或令家甲隣右互結給與腰牌毋許胥役需索牌費一分一釐聽從其便伏讀憲檄添防之制宜速議定以便

題覆夫今所宜更議者惟羅漢門郎嬌而已矣外此則

移八里岔汛千總駐劄後壠為半線淡水適中之地及
添設文員諸事尚未舉行其餘俱經遵照憲檄於南路
添設下淡水營守備帶兵五百駐劄新園設岡山守備
帶兵五百駐劄濁水溪埔扼羅漢門諸山出沒竇徑北
路添設半線守備一營帶兵五百居諸羅淡水之中上
下控扼聯絡聲援以諸羅山守備駐劄笨港增兵二百
名添設下加冬守備一營兵五百郡治添設城守遊擊
一營兵八百與鎮標三營相埒再加羅漢門郎嬌各添

設汛防兵三百則全臺共計增兵三千六百名較憲檄前指之數止多一百但此三千六百之兵必須請

旨額外添設就內地各標營分額招募按班來臺如往例三年一換然後內地不至空虛無顧子失母之病諸羅地方遼濶鞭長不及應劃虎尾溪以上另設一縣駐劄半線管轄六七百里鹿子港雖口岸扼要離半線僅十五里不用再設巡檢將巡檢設在淡水八里坌兼顧雞籠山後笨港設巡檢一員駐劄笨港佳里興巡檢仍

還佳里興駐劄帶管目加溜灣移典史歸諸羅縣治南路鳳山營縣雖僻處海邊如下埤頭孔道衝要然控扼海口打狗眉螺諸港乃匪類出沒要區當仍其舊不可移易添設鳳山縣丞一員駐劄搭樓稽察阿猴林篤佳等處彈壓東南一帶山庄下淡水巡檢一員不許留郡仍令駐劄下淡水稽察淡水以南各庄及諸海口臺鳳諸各縣各練鄉壯五百名在外縣丞巡檢各練鄉壯三百名無事則散之隴畝有役則修我戈矛鄉自為守

人自為兵此萬全之道也伏讀憲檄營伍操練宜勤虛
冒舊弊宜除塘汛分防宜變通三者皆極切當時弊有
兵不練與無兵同兵不能識將意將不能識兵情是謂
烏合器不與手相習手不與心相應是謂生疎職每誠
諭臺屬標營定以三六九日按期操演三令五申如臨
大敵又為之捐造仗房鎗砲火藥以足其用其分防外
汛之兵大汛每駐一二百人亦令如期操演查足器械
塘兵專遞公文多人無益每塘止定三名小汛之兵不

上數十人分作兩班赴就近大汛操演不許懶惰有操期不至者大汛記名逐月造冊報查又不許無故擅離汛防凡有逃亡事故立即報移內地調補不許在臺招募一人以滋弊竇違者叅革其官務使地皆實兵兵皆可用前此虛冒名糧之弊盡行廓清獨將弁書識一項未能遵諭革絕蓋緣武人不學者多鮮有親操翰墨而兵馬錢糧文移冊籍非可全憑口說且自古軍中字識名將不廢若用其人而不給其糧情理亦未甚協不揣

愚懵妄為酌議臺鎮中營遊擊及各營守備應各予書識八名外營遊擊各六名千把摠雖係微員亦不可全無一字應予書識各一名水師副將十名南北二路叅將各予八名總兵書辦十六名使粗足備具文書不至如從前冒濫將仗糧盡行禁革可謂節省至矣未審憲臺以為有當否臺地少馬無以壯軍容而資衝突今擬鎮標三營城守一營各設馬兵六十名南路北路二營各設馬兵八十名共該馬四百匹即在添設三千六百

兵額之內請

旨配撥先自內地帶馬來臺以後換人不換馬或有倒斃方就臺地孳生買補時或孳生不足亦向內地採買以來則無苦累民番之處伏讀憲檄除奸務盡附和倡亂之徒非脅從可比應將黨惡創懲黥其左面同家屬押逐原籍拘管稽查復承列單開出名數深得火烈民畏鮮死之義臺網久漏吞舟民不知國法為何物安逸而思為亂階甫平而又圖復起所以九月間舊社鹽水

港六加甸等處奸民職等不敢不便宜行事梟斬四五人杖斃六七人以定民心而固疆圉今尚未及三閱月復有石壁寮羅漢門一二亡命布散流言欲燃死灰聚黨二十八人遂敢豎旗為孽可笑可憐可憎可恨職等分遣搜捕立獲為首蔴瓜成蘇清高三楊美王教五人現今整衆搜山八面焚烈務必盡絕根株不留種類除蔴瓜成一名係朱一貴偽國公應解憲轅聽候

題達正法其餘蘇清楊美及續獲諸賊職等又將于軍

前權行專擅竿首藁街使莠民喪膽東土永寧其潛通
奸匪附和接濟之人照憲檄處分押回原籍惟是黥面
雖羞畢竟一藥即去似不如馘耳之不可復續較便稽
查其五月間舊賊已散為民者非奉憲行及他有所犯
槩不問及所以開更新之路使安靜而不自危也伏讀
憲檄要口設備議建鹿耳門砲城水陸分守竊謂鹿耳
砲城止用修築不必從新建造蓋其港暗礁淺沙渺茫
紆險非有顯然門戶可以遵道而行故須設立盪纓標

記指引迷途毫釐偶差立見齏粉雖不砲城固亦未易入也前此癸亥平臺海潮驟漲巨艦連艘並排而入今夏大師進剿潮水亦高數尺皆賴

朝廷洪福海若效靈遊魂喪魄夫豈砲城之故哉且臺賊多自內生鮮由外至倘賊來自外則郡治兵將雲屯百萬蒼黎未易侵擾若賊起自內雖隆砲之城至于天非徒無益反為漳泉內地之害職等所見不廣以為因仍補葺厥功已多此刻物力困憊俟他日另議可耳臺

地民番雜處狼子野心頑良參半建築城池確不可易
前請暫開磚石事例執事既以為難而土城木城又難
成而不能經久則亦末如之何耳茲承憲檄栽竹為城
價廉工省此亦因時制宜不得不然之勢謹即會同勘
度環萬壽亭春牛埔將文武衙署兵民房屋沿海行舖
俱為包羅種竹圍一周護以荆棘竹外留夾道寬三四
丈削荆桐插地編為藩籬逢春發生立見蒼茂祠外開
鑿濠塹苦臺地粉沙無實土淺則登時壅淤深則遇雨

崩陷多費無益止可略存其意開濠廣深六七尺種山
蘇木濠內枝堅蔌密又當一層障蔽沿海竹桐不周之
處築灰牆出地五尺高可蔽肩為雉堞便施鎗砲開東
西南北四門建城樓四座設橋以通來往量築窩舖十
二座以當砲臺如物力不敷城樓未建植木柵為門兩
重亦可暫蔽內外茲會委署臺灣縣孫令量明文數擇
日興工每十丈令設竹簽一桿杙于地中高五尺廣三
寸編千字文為號即于某字號下寫管工某人姓名照

天地青黃次序不許錯雜統計全城共幾號管工幾人
先造一冊呈送以便稽查每丈需竹幾株桐幾柯濠幾
工每種竹一株需錢幾文插桐十柯需錢幾文開濠一
丈需錢幾文舉一丈而全城價直瞭然胸中不可欺誑
工有勤惰按號稽查竹有榮枯按號栽補可無彼此推
卸含混侵漁三年之後叢生茂密雖未及石城堅固然
亦已牢不可破矣郡縣既有城池兵防既已周密哀鴻
安宅匪類革心而後可施富教而臺灣之患又不在富

而在教興學校重師儒自郡邑以至鄉村多設義學延有品行者為師朔望宣講

聖諭十六條多方開導家喻戶曉以孝弟忠信禮義廉恥八字轉移士習民風斯又今日之急務也若夫征臺將弁雖効微勞俱是臣子分內當為之事臺地員缺無幾安能人人升擢况蒙憲恩格外獎勸躁進爭心未應不肖至此此何足煩憲臺諄諄遠念哉職等狂言切直總為地方起見有懷欲達煩冗不文伏惟憲臺諒其心

而恕其罪則幸甚

覆制軍遷民劃界書

望後二日連接憲檄臺疆經理事宜已經條分登答備
細覆上想此時尚在舟中未達記室茲又承到憲檄臺
鳳諸三縣山中居民盡行驅逐房舍盡行拆毀各山口
俱用巨木塞斷不許一人出入山外以十里為界凡附
山十里內民家俱令遷移他處田地俱置荒蕪自北路
起至南路止築土牆高五六尺深挖濠塹永為定界越

界者以盜賊論如此則奸民無窩頓之處而野番不能出為害矣執事留意海疆可謂諄諄切摯議論高明爽快直截地方果能如此文武皆可卧治何其幸也惟是臺地自北至南一千五百餘里山中居民及附山十里以內之民家未經查明確實不知其幾萬戶田園不知幾萬畝各山隘口不知幾何處應俟委員勘核造冊報聞但天下非常之事必非常人乃能為某等籌度再四未得善處之方理合復請指示免致臨局倉皇惟執事

明以教之欲遷數萬戶之民居必有可容數萬家築室之處而此數萬家又不能不耕而食必有可容十數萬人耕種之田則度地居民為此日第一急務矣今全臺山中之地既欲盡棄附山平地又棄十里即以三十里而計已去一千五百餘里之三十里截長補短應得縱橫各四百五十里之地以為被遷之民之田疇廬舍不知此地從何撥給所當籌度者一也人情安土重遷非盡戀戀故地亦苦田舍經營所費不貲富家棟梁瓦椽

可以搬赴新居工匠牆垣亦費其十之六貧家土舍茅
簷無可移用一經遷徙則當從新建蓋以亂後殘生露
肘跣足饗殮不繼之貧民何以堪此茅絢土木之繁費
嗟嘆之聲既不忍聞勢不得不有以資之每屋一間給
周恤銀五錢計費錢糧五六萬兩不知動支何項所當
籌度者二也各山隘口未知幾何即以羅漢門一處而
論已有三四路可入則此一千五百里之山其隘口不
止百計每口伐木挽運百夫亦須三五日計用人夫不

下三五萬不知係官自僱募抑或派之于民所當籌度者三也一千五百餘里之界牆一千五百餘里之濠塹大工大役海外僅聞計費錢糧不下十萬兩將給之自官則無可動支之項將派之於民則怨聲四起必且登時激變所當籌度者四也寇亂風災之後民已憔悴不堪百孔千瘡俱待補救即使安靜休養時和年豐尚未能遽復元氣况又有棄去田宅流離轉徙之憂即使有地築舍有田開墾而五錢之惠能成屋宇幾何薙草披

荆能望西成幾何況又有無資可藉無地可容之憂民
遂肯餐風宿露相率遷移于無何有之鄉大荒廣莫之
野乎民而肯遷豈不甚善假如強項不依曉曉有詞將
聽其不遷而中止乎抑以兵威脅之乎所當籌度者五
也既已三令五申費盡心力復聽其不遷而中止則憲
令不行是教民刁悍而開抗官犯上之風非所以為治
也若以兵威之使移則民以為將殺已抗拒亦死不抗
拒亦死必制梃與官兵為敵至于敢敵亦遂不容不殺

矣無故而殲我良民於心有所難安殲不盡則禍不已
殲之盡則人又不服既上乖

朝廷好生之德又下失全臺數百萬之人心所當籌度
者六也自古以來有安民無擾民有治民無移民雖以
盤庚之聖商民有魚鼈之憂然而遷殷一役舌敝唇焦
至今如聞其咨嗟太息可見安土重遷本非易動况無
故而使千五百里之人輕棄家鄉以餬其口於路乎開
疆拓土臣職當然感國百里詩人所戒無故而擲千五

百里如帶之封疆為民乎為國乎為土番盜賊乎以為
民則民呼冤以為國則國已蹙以為生番殺人則剗去
一尺彼將出來一尺界牆可以潛伏可以捍追正好射
殺民人以為欲窮盜賊則千五百里無人之地有山有
田天生自然之巢穴此又盜賊逞志之區不知於數者
之外或他有所取乎夫事必求其有濟謀必出於萬全
循斯檄也以行能必其有濟否無濟而不召亂猶之可
也殘民而有功於國亦未為不可也能必其不召亂不

殘民而又能有功於國則算出萬全矣不然願執事之
熟思之也

論臺變武職罪案書

臺灣失事武職七十餘員分為三案勘覆陣亡殉難及
劉得紫等不失臣節諸人可無疑議其餘棄地逃歸在
臺從賊一槩輕擬此乃道府文員欲行善事非鄙人所
敢掠美也從賊諸員皆以蹤跡未明請親覆訊逃歸諸
員則以逃之一字軍法所忌槩用退澎二字代之婦人

之仁其實可笑

國家刑賞異用所以鼓勵臣節為斯世存三綱五常使知禮義廉恥之外尚有誅戮可畏耳有春夏而無秋冬則四序不成有慶賞而無刑威則亂賊接踵故魯人肆皆春秋譏之惟佛氏慈悲買虎蛇放生而已矣李由陳喜等六弁既經從賊失身辱

國則罪同叛逆之科戀不忍誅奚為乎周應龍玩寇陷臺實為戎首喪師棄地潛逃泉州張彥賢王鼎等六員

坐視其協主許副將之戰死而不救棄城聯踪逃去澎湖與直走泉州之王丑皆不容於堯舜之世者也此輩平日享榮華糜祿俸無事則耀武揚威小警則垂頭喪氣養成叛亂挈家奔逃

朝廷封疆棄若敝屣倘聽優游漏網其如

國家體統何況守土之臣文武一例文員無兵不能抵敵道府廳縣梁文煊等一走澎湖尚在封域之內即已駢首市曹周應龍張彥賢等有兵有弁可以殺賊澎湖

又屬他境泉州則在千里之外遁逃獨遠反可晏然從
寬何其苛於文而厚於武也某武人豈不自愛其等竊
恐九原之下梁文煊等有所不服且許副將忠魂亦必
怒髮裂眚痛心疾首不肯使奸人獨生何則天下事惟公
惟正可以使人心服消宇宙不平之氣此曹可免竿街
則梁文煊等皆為枉死失出失入二者必居一於此矣
某與道府同舟共濟意在協恭和衷既已曲從所議何
必為此無益之繁詞但恐執事以柔懦暗昧見責謂武

人欲效慈悲不知

國體則某不任受也應否從寬從嚴執事自有定見不必以某言為疑某止表白其心迹亦自知嫉惡太嚴有失厚道惟執事恕而教之

論劉得紫書

原任臺鎮中營遊擊劉得紫品行端方性情溫雅本非小就之器今陷賊不屈忠貞之操深可嘉尚全臺士庶既已衆口一詞某又確勘真實所謂從容就義臨大節

而不可奪者殆其人與某自入臺以來閱人甚多所敬
且愛惟此君耳雖盛怒之下見其來則欣然以喜渠雖
名節既成不圖仕進某竊願執事特疏褒旌以為千秋
志士之勸更冀題補闕缺快此邦士民耳目且使地方
收得人心效一舉而數善備也在某非有所私實為世
道人心起見見奸回不忠則欲殺欲割見忠臣義士則
欲泣欲歌賤性固然惟執事勿吝成人之美綱常名教
尚賴焉某白

東征集卷三